

PHILIPPE par la grace de Dieu Roys de France, a tous ceux qui verront ou orront ces Lettres, *Salut*. Il ne puist estre mesconneu par tout nostre Royaume, comment nous autresfois, & plus considerans la grant *destruction, & mortalité de chevaux, & aucunes fois de personnes*, qui par les *tournoyemens & les joustes* sont avenez souvent en nostre Royaume, avons generaument, & solennellement (*b*) deffendu, & fait deffendre, sus grans peines pecuniaires, & corporels, que nuls de nostre Royaume, ou nostre subget, ne alassent en tel fait en nostre Royaume, ne dehors. Et avec ce par (*c*) *la Sainte Eglise de Rome a esté deffendue sus peine d'excommeniement* és personnes singulieres, qui contre la deffense vendroient, & de *interdit* és Villes, & és lieux, ou tels faits seroient faits, lesquelles sentences ont esté *solennellement publiées* par tout nostre Royaume long-temps. Et comme iceste deffense doie de tant miex estre gardée, comme plus grant cause appert de la faire, *Nous* regardant que orendroit nous avons *Guerres* en aucune partie de nostre Royaume, a laquelle tels faits pourroient moult estre nuisables, *du Conseil & de l'assentement des Prelats, & Barons de nostre Royaume* avons *Establi & Establissons* que quiconques nostre subget, de quelconque condition, estat, dignité ou Seignourie que il soit, *ira en fait d'armes*, comme de *tournoyemens, ou de joustes* en nostre Royaume, ne dehors, ne autre fors en nostre Guerre, ce fait, soit *condampnez sans autre jugement* atendre, a tenir *son corps en nostre prison fermée, la ou nous le voudrons envoyer par l'espace de un an tout entier*, sanz recreance avoir, & que la meilleure de toutes les maisons que *elle ara soit abatiue tout, & arrasée*. Et encore pour ce que chascun gart plus diligemment ceste deffense, *Nous Establissons & Ordonons* de nostre autorité royale, & par le conseil & l'assentement de nos Prelats & Barons devant dis, que toute la valüe *des fruits & des isües de sa terre d'une année* soit levée par nos gens, & tournée devers nous a convertir ou profit *du passage de outremer*. Et encore pour ce que aussi bien est a jugier & tenir pour ennemy, celui qui en nostre Royaume demeure paisiblement, & le vuide, & desgarnist des choses, qui necesseres sont a nous & a nos subgez & a nostre Guerre maintenir encontre nos ennemis, comme celui qui manifestement se met a grever, & dommager nostre Royaume, & nos subgez par Guerre ouverte, *Nous Establissons & Deffendons* de nostre autorité royale estroitement, *sus peine de forfait* cors & avoir a nous, que nuls de quelque condition, ou estat que il soit, *ne traye, ne face traire, mener, ou porter hors de nostre Royaume, chevaux, armes, armeures, ne Bled, ne Vin sans nostre congié especial & par nos lettres pendantes*, lesquelles il seroit tenus a monstrier. Et se aucuns par aventure est, ou puect estre trouvez, ou pris, qui ait fait en aucune maniere contre ceste deffense, *nous le tenons pour atteint & forfait a nous en cors & en biens*, sanz autre jugemens atendre. Et pour ce que par ignorance nul ne se puist escuser, que il ne doie porter, souffrir, & paier les peines dessus dites, se elles estoient commises, *Nous donnons en Mandement*, par la teneur de ces lettres, a tous nos *Seneschaux, Baillys, & Prevost*, que il, en leur assises, & en toutes les bonnes Villes de leurs *Seneschauciées, Baillies & Prevostez*, tous ceus que il trouveront, *puisque ces choses auront esté ainsi solennellement criées & publiées, faisans, ou avoir fait contre nos dites Ordonnances & deffenses*, punissent deüement, par les peines dessusdites, sanz faire grace ne deport a nulluy. *Donné à S: Oüen prez Paris, le Samedi après feste S: Remy, l'an de grace mil trois cens & quatorze.*